

四庫全書

集部

欽定四庫全書

集部

北海集卷十三至十五

詳校官石中允臣薩敏

主事臣呂雲棟覆勘

謄錄監生臣陳長春

欽定四庫全書

北海集卷十三

宋 綦崇禮 撰

詔

賜端明殿學士左朝奉大夫江南西路安撫大

使兼知洪州趙鼎乞除一宮觀差遣不允詔

勅趙鼎省所奏劄子乞除一宮觀差遣事具悉股肱太

臣義均一體入則參禪機務出則分理藩條中外迭居

祖宗之制也顧今郡邑空殘民力凋敝事繁責重非如

平時此大臣與朕同所宜憂者覽卿所陳乃以立朝多
怨意有避就則過矣卿既以直自許計在官之事必公
厥心又何禍患之有矧卿謂朕能施恩於拔擢進用之
初豈獨不能保卿始終待遇之意苟使人人慮患自為
之謀咸欲如卿彼嘗更言責而有所抨彈者是将舉不
得並立於朝忠厚之風斯復焉在勉安乃職式副眷懷所
請宜不允故茲詔示想宜知悉秋熱卿比平安好遣書
指不多及

賜新除工部尚書胡松年辭免恩命不允詔

勅松年省所奏辭免工部尚書恩命事具悉昔晉惠公在秦陰飴甥一言而秦伯乃歸晉君楚漢方爭侯生一說項王而太公呂后復還於漢今上天悔禍強敵欲和信使繼通約好在此思得辨志之士專對之才如彼二人往焉庶克諭回兩宮平定邦國選於在列肆以屬卿乃聞慨然起任吾事惟忠誼有激於內而幾微不見於色成功可必朕用嘉之中臺常伯班秩雖高顧卿綿

歷二省可以序進朕意恨薄尚何足辭所請宜不允故
茲詔示想宜知悉

賜新除建康府路安撫大使兼知池州呂頤浩

再辭免恩命不允詔

勅頤浩省所劄子奏辭免恩命事具悉君子處已以用
捨為行藏大臣立朝寄安危於進退卿中辭政柄出擁
齋旄閔勞機務之繁優假真祠之逸惟乃心王室能忘
國步之艱顧無逾老臣用倚帥藩之託賜環趣召弭節

來朝蒼生之望素高元老之猷益壯垂紳正笏精神端
可以折衝緩帶輕裘談笑何難於卻敵維吾舊德宜體
眷懷勉圖克復之功毋徇撓謙之節所請宜不允故茲
詔示想宜知悉

賜觀文殿大學士提舉臨安府洞霄宮呂頤浩
辭免恩命不允詔

勅頤浩省所奏辭免恩命事具悉卿事朕艱難為時勲
業三陟蒙司之峻亦既累年再辭魁柄之崇宜加異數

迫人言之存至悵朕意之莫伸收建旄開府之儀更秘
殿隆儒之職用寵光於故弼俾休逸於殊庭終始厚恩
應識保全之意優游晚歲毋忘兢慎之思其即欽承尚
奚遜避所請宜不允故茲詔示想宜知悉秋冷卿比平
安好遣書指不多及

賜呂頤浩乞收還節度使印鉞落開府儀同三
司却除一合得職名不允詔

勅頤浩省所奏乞除一合得職名事具悉朕惟古者任

人各有定位功高者厥祿厚德盛者其爵尊故知將相
之官自是勲賢之器卿有大德於朕有大功於時既宣
衛上之忠遂陟秉鈞之任雖云免政豈不念勞肆開公
府之儀併侈將旄之寵務隆異數特越常規視人望以
為宜在朕心而無歉矧分臨於巨屏煩坐鎮於長江六
蠹前驅用佐先聲之震懼三槐在著尚期舊德之來歸
往體眷懷毋勞遜避所請宜不允故茲詔示想宜知悉

賜尚書左僕射同中書門下平章事呂頤浩等

為火災待罪不允詔

御筆批天之降災緣朕失德方聳懼未寧遽得頤浩所
上表欲與朕分譴益明愧戢可降詔安慰之

勅頤浩省所上表奏今月二十二日越州遺火延燒民
居上軫聖慮乞待罪事具悉朕惟失德孽火示災延及
無辜夕惕以懼將深戒於不治方引咎以責躬忽覽奏
函力祈分譴震於夙夜方且畏天之威移之股肱亦豈
朕之所欲宜思勵翼用副憂勤撫綏失業之氓助宣保

民之意各安厥位勿復有陳所請宜不允故茲詔示想
宜知悉

賜特進尚書左僕射同中書門下平章事呂頤
浩辭免監修國史恩命不允詔

勅頤浩省所劄子奏辭免恩命事具悉自前世以來致
詳史事人君之言動則起居有注輔相之經綸則時政
有紀授之秘府日而歷之則著作有官此其槩也顧宰
相之職無所不統矧左右史乃其所屬時政記乃其所

行而秘府三館則又舊制所兼隸也朕方深念艱難之際記事多缺肆命攸司舉行厥官則委卿監總固其宜耳昔張說以舊相居邊鎮即軍中修史今雖戎馬未息軍國務繁卿獨不能以庶政餘隙董成茲事乎一代大典方以屬卿勉副朕懷毋復謙避所請宜不允故茲詔示想宜知悉

賜特進尚書左僕射同中書門下平章事兼知樞密院事都督江淮荆淝路諸軍事呂頤浩辭

免長男承議郎抗次男宣教郎撫除職名賜章
服恩命不允詔

勅頤浩省所上劄子奏辭免男抗撫除職名賜章服恩
命事具悉卿再登元輔嘗立大勲比總六師往督諸道
忠勤誠至不憚暑行而於其所私曾弗內顧在朕其可
忘之矧方倚卿以圖邦國再造之功而卿之息則未錄
豈其禮哉肆推茂恩斷自朕志今卿乃以異時僥倖者
為戒引誼力辭殊失厥旨宜識茲意勿復重陳所請宜

不允故茲詔示想宜知悉夏熟卿比安好遣書指不多及

賜新除御史中丞富直柔辭免恩命不允詔

勅直柔省所奏辭免恩命事具悉朕躬履艱難鑒既往之失廣直言之路開無諱之門凡白簡所彈皂囊所論不憚屈已從之惟恐下情之壅於上聞也然人臣進言自昔稱難而人主聽言尤為匪易伊欲天下有盡言之益而上有用言之效安得遇事必言而言之必可行者

哉卿天資直諒綽有祖風諫垣瑣闥納忠多矣不詭不
訐動中事會蓋夫二者之難求適厥中期於濟國家之
務而已朕用嘉之肆進汝位長茲風憲之司俾率乃僚
冀聞正論往體眷意何以辭為所請宜不允故茲詔示
想宜知悉

賜新除工部侍郎賈安宅辭免恩命不允詔

勅安宅省所奏辭免恩命事具悉周漢二宣皆中興主
詩人所歌既以任賢使能為宣王美而史贊孝宣之治

至于技巧工匠器械後世鮮及以見吏稱職之効朕甚慕焉惟卿發策妙齡踐揚最久安恬知止勇於退休緬懷資善之遊厥有甘盤之舊召還瑣闥益勵靖共冬官攸司亦卿故領庶幾任使之廣必值於賢能而綜核之精弗遺於工技勉助於治無庸固辭所請宜不允故茲詔示想宜知悉

賜新除龍圖閣直學士知泉州葉份辭免恩命
不允詔

勅葉份省所奏辭免恩命事具悉自南幸以來中原梗塞兵拏不解用度日滋及胡馬寇江毒流荆湘民力既屈儲廩一空而警蹕屢遷益繁供億卿器識沉靖心計精明獨幹民曹于茲兩歲不動聲色餉給以充非才智有餘孰堪其事方茲進位倚以成功乃力抗章願從均逸念賢勞之已久宜誠懇之重違改職守藩時維常典往祇成命勿復謙辭所請宜不允故茲詔示想宜知悉

賜新除徽猷閣直學士淮南東西路宣撫使叅

謀官宋伯友辭免恩命不允詔

勅伯友省所奏辭免恩命事具悉朕於裁度萬務待遇庶品付以至公之道無容心焉迺者臨遣上將宣威淮甸凡厥叅佐聽以自擇而有言於朝者首願得卿顧方倚以成功重違其請肆陞學士之職俾贊幕中之畫謂當伸於知己欣然從命而猶以疾病不能為解朕甚疑之卿之獲此蓋必有見取者矣其尚何辭所請宜不允故茲詔示想宜知悉

賜新除御史中丞辛炳辭免恩命不許詔

勅辛炳省所奏辭免恩命事具悉朕嘗膽而懲大難虛
心而受盡言推抑世權以伸風憲之威張明紀綱以正
朝廷之體務獎延於忠謹用開廣於聰明卿時之老成
邦之司直頃就閑於鄉曲每騰譽於搢紳迨茲三聘而
肯來何止單言而寤意履臺端之朞歲倡國是於一時
高第當遷實才堪稱伊欲人勵思無邪之志肆俾卿專
中執法之司惟有知而必言庶不繩而自肅若乃收大

才以振風俗開公道以一權綱責實而修誠崇儉而節用備聞斯語深沃朕心勉卒令猷毋留成命所請宜不允故茲詔示想宜知悉

賜神武副軍都統制岳飛辭免恩命不允詔

勅岳飛省所奏辭免恩命事具悉朕以九江之會襟帶武昌控引秋浦上下千里占江表形勝之地宿師遣戍向已屬卿增壯軍容爰加使號蓋圖乃績顧匪朕私矧殄寇之功馭軍之略表見於時為後來名將江湖之間

尤所欣賴兒童識其姓字草木聞其威聲則夫進秩任就一道豈特為卿褒寵亦以慰彼民之望其尚何辭所請宜不允故茲詔示想宜知悉

賜新除龍圖閣學士充川陝宣撫處置副使盧

法原辭免恩命不允詔

勅法原省所奏辭免龍圖閣學士充川陝宣撫處置副使恩命事具悉朕留蹕東南憂深西顧舉陝蜀之計付之樞臣閱其久勞召還入輔重惟布宣威德撫循兵民

孰克代之俾任吾事以卿位列常伯名高本朝巴梁劍外之人稔厥治行秦雍山西之士服其風聲是用參畀中權盡護諸將河圖峻職增賁戎昭胡為抗章猶爾避命顧令行之莫反且衆選之已詳既云竭力於難虞毋復執謙於辭遜所請宜不允故茲詔示想宜知悉夏熱卿比安好遣書指不多及

賜新除兵部侍郎程瑀辭免恩命不允詔

勅程瑀省所奏辭免恩命乞宮觀事具悉人臣之忠尤

難於盡言君子之孝莫大於養志卿舉職東省遇事必
陳既得盡言之美朕用嘉之載從推擇進貳夏官時乃
次遷理無足避顧以親老自列遂求退閒經不云乎立
身行道揚名於後世以顯父母孝之終也二親之志其
亦以是望于卿耳口體之養於親奚有惟卿慨然學古
之道在君親之際慮之宜熟夫尚何辭所請宜不允故
茲詔示想宜知悉

賜左朝奉大夫試尚書刑部侍郎兼權吏部侍

郎胡文修辭免兼侍讀恩命不允詔

勅交修省所奏辭免兼侍讀恩命事具悉朕講道藝於
干戈之隙訪鴻碩於政事之餘庶博所聞以輔不逮卿
精深之學直諒之資時之醇儒古之益友頃從禁掖嘗
侍經惟有嘉篤實之誠每竭紛綸之辨既復論思之近
列屬虛進讀之常員惟舊是圖在今為稱往懋盡規之
義毋煩避寵之辭所請宜不允故茲詔示想宜知悉

賜左朝奉大夫新除兵部尚書趙子晝辭免恩

命不允詔

勅子畫省所奏辭免恩命事具悉眷我國家教行宗屬
雖久襲儒冠之盛固不乏人而間持從橐之榮未嘗在
事豈有嫌於同姓蓋莫值於真才今卿立朝自我作古
缺文寔舉既更禮學之清司密旨是承復寘樞機之要
地所居自稱無適不宜肆還正於貳卿俾分釐於武部
益詳閱試庶盡猷為其戮力於難虞毋執謙於辭遜所
請宜不允故茲詔示想宜知悉

賜捧日天武四廂都指揮使明州觀察使權主
管殿前公事劉錫辭免恩命不允詔

勅劉錫省所奏辭免恩命事具悉卿才略天資勲名世
顯入典禁廂之舊出分邊閫之憂克嗣前人為時宿將
勤勞具在艱險不渝朕聽鼓鞀而有思悼干戈之未戢
眷我爪牙之舊困於口舌之煩坐廢遠方倏更累歲用
趣還於宿衛俾盡復於官聯朕不乃忘卿當昌報尚益
圖於忠力毋過飾於謙辭所請宜不允故茲詔示想宜

知悉

賜龍圖閣直學士左朝奉大夫知處州耿延禧
乞除在外宮觀差遣不允詔

勅延禧省所奏乞除在外宮觀差遣事具悉陟降多士
懷思舊人方霸府初開曾艱難之共濟暨皇家再造率
疎斥而莫留有慨予心實勤乃眷起於瘴海流離之後
付以便邦偃息之優式資愷悌之風已報循良之政遽
茲引疾還欲就閒雖持橐居中未克在補過拾遺之列

而析符於外姑欲圖承流宣化之功毋復有陳勉共乃
事所請宜不允故茲詔示想宜知悉春暖卿比平安好
遣書指不多及

欽定四庫全書

北海集卷十四

宋 蔡崇禮 撰

詔

賜新除端明殿學士朝議大夫權同知三省樞
密院事李回辭免恩命乞除一宮觀差遣不允

詔

勅李回省所奏乞除一宮觀差遣事具悉頃分政府往
奉東朝由寮窠之不虔致軍民之弗靖肆圖宿望更領

行臺復秘殿之班聯視輔臣之儀物眷懷良舊寵命維
新何以嫌疑欲從閑散顧晨昏久廢甫迎護於慈闈而
道路方長賴總齊於庶務亟安爾位用寬朕憂所請宜
不允故茲詔示想宜知悉夏熱卿比安好遣書指不多
及

賜資政殿學士左中大夫江南西路安撫大使
兼知洪州李回乞除一官觀差遣不允詔

勅李回省所劄子奏乞除一官觀差遣事具悉朕以中

原未定夙宵疚懷巡省治兵駐於吳會眷言豫章則吾
西屏內撫江表北控淮右非老成重望孰克鎮之卿由
廟堂往命帥事驅攘羣盜綏輯疲民勤勞踰年休有成
績方茲倚賴遽欲求閑引疾自言殊非所望惟舊勞則
知體國而卧護可以折衝勉親藥石之良用副藩宣之
託所請宜不允故茲詔示想宜知悉春寒卿比安好遣
書指不多及

賜新除端明殿學士左朝奉郎充江南東路安

撫大使兼知建康府充壽春府滁濠和州無為
軍宣撫使李光辭免恩命不允詔

勅李光省所奏辭免恩命事具悉朕惟侍從之賢出入
迭用其在朝則矢謨禁闥為腹心之臣在外則折衝大
邦膺屏翰之寄時有緩急任隨重輕朕方擢卿從班首
冠六聯之長屬建康謀帥所急在茲雖坐執銓衡甚宜
其職而宣威方面無以踰卿肆陞秘殿之華以壯長城
之託亟祇成命勿事牢辭所請宜不允故茲詔示想宜

知悉

賜新除吏部尚書李光辭免恩命不允詔

勅李光省所奏辭免恩命事具悉為國之患在於有賢而不能
用卿學行修飭識慮通明許國之誠慨然有為濟務之材綽有
餘裕搢紳所賢而朕所知也天官常伯任首六聯位次二府需
賢而用今始得卿胡為抗章猶爾遜避亟祇成命庸副朕懷所
請宜不允故茲詔示想宜知悉

賜新除戶部侍郎柳約辭免恩命不允詔

勅柳約省所奏辭免恩命事具悉昔漢官有試守者滿歲則為真而唐制要官亦俾權知久乃正授蓋已試而遷則上之用人也審循次而進則士之居位也安朕於貳卿致詳者如此卿以疏通之才司邦國之計閱時雖近績効已聞就正厥官孰曰不可矧方倚以使事之重遠聘絕域送之以禮寵命是宜其即欽承無勞遜避所請宜不允故茲詔示想宜知悉

賜新除顯謨閣直學士左朝請郎知平江府李
彌大辭免恩命不允詔

勅彌大省所奏辭免恩命事具悉卿歷事三朝再登八
座方圖宿望俾扞外虞與其屈叅相幕之行曷若專委
藩方之寄還陞延閣用賁左符往體恩私毋勞遜避所
請宜不允故茲詔示想宜知悉夏熱卿比安好遣書指
不多及

賜新除戶部尚書李彌大辭免恩命不允詔

勅彌大省所奏辭免恩命事具悉自兵興以來費出無
藝民力屈財用殫至於斯極矣朕方興衰撥亂經營四
方而軍賦所資為尤急必有為朕裁理調度知取知予
使民不困而用足者以任吾事維卿靖重之操詳練之
才數歷三朝為時宿望比還省戶未復舊班進長地官
繫老成是賴毋留成命庸副朕懷所請宜不允故茲詔
示想宜知悉春暄卿比安好遣書指不多及

賜新除叅知政事翟汝文辭免恩命不允詔

勅汝文省所劄子奏辭免恩命事具悉卿侍從三朝為
時宿望虛佇舊矣屬輔臣未備物色其人想見儀刑起
之田里進對之際深契朕心顧豈勞承密旨於鑿坡蓋
將俾濟嘉謨於廊廟擢陪大政遂斷不疑詩不云乎雖
無老成人尚有典刑朕今自喜得老成之助則發其所
蘊協贊經綸亦卿之志也夫尚何辭所請宜不允故茲
詔示想宜知悉

賜叅知政事翟汝文乞除在外一宮觀差遣不

允詔

勅汝文省所上劄子奏乞除在外一宮觀差遣事具悉
朕履茲艱運憂畏靡寧所賴二三大臣合誠交脩用輔
不逮矧卿以先達宿望同陞廟堂久懷嘉謀庶克有濟
中外攸屬曾亡間言何嫌何疑而弗安厥位乞骸之語
匪朕欲聞勉協乃心以永終譽所請宜不允故茲詔示
想宜知悉

賜新除太尉依前武成感德軍節度使神武左

軍都統制福建江西荆湖南北路宣撫副使加
食邑五百戶食實封二百戶韓世忠辭免恩命

不允詔

勅世忠省所劄子奏辭免恩命事具悉人主之興事當
勸於用賞人臣之有功常說於見知卿出總王師往行
天討一鼓而平甌粵再舉而臨湖湘妖孽悉除逋逃自
服乃峻策勲之典俾升掌武之班朕既知卿徇國之勞
卿宜悅此褒功之意亟祇成命何用深辭所請宜不允

故茲詔示想宜知悉

賜新除開府儀同三司韓世忠辭免恩命不允

詔

勅世忠省所劄子奏辭免恩命事具悉朕以湖湘之境
氛祲既清淮泗之衝藩籬未固惟卿志無遺慮勇不辭
難酬其前勞乃視儀於大府加之今授蓋倚重於長城
既兼將相之名宜徇邦家之計忠勤有素謙遜何為所
請宜不允故茲詔示想宜知悉

賜韓世忠再上劄子辭免恩命不允詔

勅世忠省所再上劄子奏辭免恩命事具悉朕薄於奉
已而傾帑廩之入以養兵慎於官人而極臣隣之寵以
任將顧何所事蓋欲有為卿繼立竒功進圖遠略既削
平於多壘將綏定於中原迨此策勲適當遣戍擬台司
而建府臨淮甸以宣威豈曰朕私時惟國計師言咸穆
廟勝可期毋煩謙遜之辭式副憂勤之念所請宜不允
故茲詔示想宜知悉

賜韓世忠三上劄子辭免恩命不允詔

勅世忠省所三上劄子奏辭免恩命事具悉朕惟五材並用誰能去兵四海未安注意在將故不愛三軍之費以收其力不遺一戰之勞以勤其功卿昨定湖湘未加信賞茲屯淮泗宜有寵行進號儀同式循典故而乃深陳中懇薦貢忱辭欲消貪覬之風願保謙冲之節載觀于守益歎爾賢然爵於朝而盡公則令惟行而難返第思厚報毋執小廉往體眷懷亟祇成命所請宜不允故

茲詔示想宜知悉

賜新除武泰軍節度使依前侍衛親軍步軍都
總指揮使權主管殿前司公事郭仲荀辭免恩
命不允詔

勅仲荀省所劄子奏辭免恩命事具悉朕祇畏天戒肆宥
多方宿負往愆咸與更始矧卿頃嘗遠謫亦既召還扈
衛勤勞彌見忠謹而旄鉞未復有歎朕心屬更需恩在
法當叙所請宜不允故茲詔示想宜知悉

賜武泰軍節度使知明州軍州事兼管內勸農
使兼沿海制置使郭仲荀辭免新除檢校少保
恩命不允詔

勅仲荀省所劄子奏辭免檢校少保恩命事具悉卿齋
壇名將勲閱故家久扈殿巖顧閔勞於宿衛出臨海道
將倚重於蕃宣懇陳避寵之誠願罷典章之職載嘉冲
節爰錫徽章假貳公亞保之崇仍六纛元戎之舊用光
閭寄實典邦彝往體茂恩毋留成命所請宜不允故茲

詔示想宜知悉冬寒卿比平安好遣書指不多及

賜侍衛親軍步軍都指揮使武泰軍節度使權
主管殿前司公事郭仲荀乞罷軍職除一宮觀

差遣不允詔

勅仲荀省所奏劄子乞罷軍職除一宮觀差遣事具悉
卿勲闕名家將壇宿望典司環尹祇扈殿巖盡一意以
周旋復再更於寒暑行營不警列衛無譁忽披懇款之
辭遂有退閒之請顧爪牙之攸賴吾寢為安且精力之

尚強乃勞奚避體茲眷屬姑即官常所請宜不允故茲
詔示想宜知悉

賜新除檢校少保郭仲荀辭免恩命不允詔

勅仲荀省所上表辭免恩命事具悉宣尼有言惟器與
名不可以假人今檢校官稱雖無所事而名叅公孤亦
云寵矣加之方鎮予以勸勞朕敢持是而輕厥付予顧
卿久勤宿衛茲解軍權稽按舊章當有褒進初非虛假
奚用牢辭所請宜不允仍斷來章故茲詔示想宜知悉

冬寒卿比平安好遣書指不多及

賜新除信安郡王孟忠厚辭免恩命不允詔

勅忠厚省所劄子奏辭免恩命事具悉朕惟昭慈之盛
德有社稷之大功棄養東朝奄經祥祭疏恩外族敢後
彝章念其終鮮於弟兄維乃獨當於門戶故用昔舅家
之禮而啟茲異姓之封仰慰神靈下孚觀聽然位高則
寄愈重貴極則責愈深凡光寵於一身欲保安於九族
勉追遺志何用謙辭所請宜不允故茲詔示想宜知悉

賜寧遠軍節度使充醴泉觀使孟忠厚辭免回

授轉官恩命不允詔

勅忠厚省所劄子奏辭免恩命事具悉乃者戎事方繁
顧朕不獲躬致東朝之養肆命百執從衛遠行逮其來
還實宣忠恪序遷階秩用酬厥功卿選自懿親首尾在
事格以有司之法分為屬族之榮非曰寵私時維常典
體予孝治勿事謙辭所請宜不允故茲詔示想宜知悉
秋冷卿比安好遣書指不多及

賜端明殿學士左中大夫新除知溫州韓肖胄
辭免恩命不允詔

勅肖胄省所劄子奏辭免新除知溫州仍舊職恩命伏
望止以本官改授一在外官觀差遣事具悉卿元勲舊
闕名宰世官有嘉濟美之才俾贊本兵之政張旃敵境
遠煩將命之勤借箸籌帷還賴告猷之助方資戮力叶
濟良圖顧辭之甚堅欲留賢而不果乃錫守符之重仍
聯殿屋之華豈不念勞姑從均逸維茲禁職蓋近臣出

入之儀如彼要邦實今日便安之地相攸以授假寵而行何必官祠始為閑退所請宜不允故茲詔示想宜知悉

賜端明殿學士左中大夫同簽書樞密院事韓
肖胄左朝奉大夫試工部尚書胡松年辭免賜
馬不允詔

勅肖胄等省所劄子奏辭免賜馬事具悉卿昨違行闕
遠聘殊封嘗分駟駿之良俾佐驅馳之力越飛狐之險

阻知我馬之虺隤緬想忠勤每深咨歎甫結二邦之好
方嘉四牡之還未足償勞曷云納賜往備服乘之用第
思摧秣之宜所請宜不允故茲詔示想宜知悉

賜端明殿學士左中大夫同簽書樞密院事
充大金國軍前通問使韓肖胄辭免特賜恩
澤七資起發錢一千貫左朝奉大夫試工部尚
書充大金國軍前通問副使胡松年辭免特賜
恩澤五資起發錢八百貫恩命不允詔

勅肖胄等省所劄子奏辭免特賜恩澤并起發錢事具
悉卿將命出疆推誠許國惟邦家社稷之計正賴深謀
則閨門子弟之私可貽纖慮肆頒渥澤用慰遠懷載瞻
道里之長併給齎裝之費歸兩宮而平二國卿其勉於
成功庇九族而祿萬鍾朕豈難於優報體茲至意毋復
多辭所請宜不允仍不得再有陳請故茲詔示想宜知
悉

賜新除同簽書樞密院事韓肖胄辭免恩命不

允詔

勅肖胄省所劄子奏辭免恩命事具悉朕惟叅五兵之
務實賴於智謀合二國之成必資於忠信兼此重任屬
吾世臣卿克紹家聲允為國器運籌之略專對之才求
於禁近之間無若老成之比進聯右府豈獨本朝之得
人出聘北方亦知韓氏之有後繫功名之是似庶禍亂
之可平勉副眷懷毋勞謙避所請宜不允故茲詔示想
宜知悉

賜新除吏部侍郎韓肖胄辭免恩命改授一州

不允詔

勅肖胄省所奏辭免恩命事具悉卿頃由宰士擢貳冬
卿閱歲月之再周厥材猷而自見眷言勞勩宜有序遷
朕方紹立邦基緬懷世烈故國在念豈徒喬木之思遺
笏僅存猶若甘棠之比矧得賢於後裔宜戮力於本朝
進執銓衡茲圖乃績出分符竹可副朕心往亟踐於厥
官毋久留於成命所請宜不允故茲詔示想宜知悉

欽定四庫全書

北海集卷十五

宋 綦崇禮 撰

詔

賜新除捧日天武四廂都指揮使充淮南東西
路宣撫使司都統制王瓊辭免恩命不允詔

勅王瓊省所奏辭免恩命事具悉自艱難以來兵政寢
隳行營置帥非復舊制而軍衛之職多缺朕甚念之卿
出自世將為時虎臣宣力爪牙既多成績出屯淮楚方

賴協心持假四廂之權以示三軍之重遽披誠悃請避
寵榮惟勉於大功因矜於小節所請宜不允故茲詔示
想宜知悉

賜捧日天武四廂都指揮使慶遠軍承宣使神
武前軍統制王瓊辭免軍職不允詔

勅王瓊省所奏辭免軍職事具悉國家宿兵京師密衛
王室列置主帥付以軍權號令訓齊克壯爪牙之勢承
平既久紀律寢隳比更亂離播棄殆盡而廟衛之職徒

存其名顧猶慎寵將臣而不敢輕廢者示朕區區未嘗
一日忘其舊耳卿夙由忠勇分總行營將俾出師特加
是命雖休兵淮楚姑輟乃行而盪寇荆湖正需爾力臨
遣之意無怠于前儻能體朕思復舊典之心以共恢遠
之略不亦善乎辭遜小廉於卿何有所請宜不允故茲
詔示想宜知悉

賜新除知揚州充淮南東路安撫使湯東野辭
免恩命不允詔

勅東野省所劄子奏辭免恩命事具悉朕北顧中原淮
海實為控扼之地自分鎮以來未得其人使吾遺氓更
以重困肆求侍從之舊往綏撫之如卿材能著於已試
起當閫寄孰曰不然云胡抗章猶以疾諗夫天下多事
正聖哲馳騫之時卿體國有素顧欲辭難而就佚耶其
趣之官副此眷倚所請宜不允依已降指揮疾速前去
之任有合申事件條具申尚書省故茲詔示想宜知悉
春暖卿比安好遣書指不多及

賜徽猷閣直學士右太中大夫知揚州充淮南
東路安撫使湯東野乞依舊一官觀差遣不允

詔

勅東野省所狀申尚書省乞依舊一官觀差遣事具悉
人臣事君安危不奪其節劇易不辭其事卿以材能見
推當世出入禁從為吾適臣於事君之義宜所知也今
風俗媮薄而利害之心勝士大夫從仕舉欲即安平之
地則吾境土不幸而更兵火者多矣將孰與之撫凋瘵

而扞牧圉也哉姑悉乃心以副朕意辭難就佚得無嫌乎所請宜不允故茲詔示想宜知悉夏熱卿比平安好遣書指不多及

賜新除禮部侍郎陳與義辭免恩命不允詔

勅與義省所劄子奏辭免恩命事具悉卿以經術之深既資勸講辭華之贍兼俾代言而任總銓曹日櫻繁務惟精明之立斷在剴撥而有餘然而必將責吏事之能則非所以用儒臣之意貳卿之列掌禮是優品秩雖同

劇聞則異方訂裁容典固有賴於判經則潤色絲綸蓋無妨於視草欲賢勞之少佚極清選以良宜初匪超踰奚煩遜避所請宜不允故茲詔示想宜知悉

賜左奉議郎試尚書禮部侍郎兼侍講兼權直學士院陳與義乞除一在外宮觀或僻小一郡不允詔

勅與義省所奏乞除一在外宮觀或僻小一郡事具悉卿之求去蓋屢矣而不止朕之留卿則確然而莫移顧

委質事君將內外之奚擇而用人立國患賢才之未充
眷予侍從之流有此英竒之望平允甚宜於文部直清
復見於秩宗矧視草禁嚴方待宣公之中助且執經惟
幙可容揚秉之外遷卿雖自處之有辭朕豈苟遺而無
故體茲至意毋復固陳所請宜不允故茲詔示想宜知
悉

賜新除吏部侍郎陳與義辭免恩命不允詔

勅與義省所奏辭免恩命事具悉選部舊為劇曹自南

渡以來典籍散亡姦弊百出或者當用文學之吏治之庶幾能勝則又大不然夫銓綜之地多士所趨而專以吏道繩焉其肯退聽昔人蓋有簡要清通之目非吾儒學之臣其素節雅望足以領袖後進者顧未易以厭服士心而見推乎允也朕今擢卿於詞掖而行之選事豈苟然哉亞祇厥官毋留成命所請宜不允故茲詔示想宜知悉

賜左奉議郎試尚書吏部侍郎兼侍講兼權直

學士院陳與義乞除一小郡或宮觀差遣並不
允詔

勅與義省所奏陳乞事具悉朕閱勞多虞事皆草創
而銓選之法壞比命有司哀輯科條聚為成書庶幾遵
行稍有定制但今輿圖半沒仕路猶廣衣冠流離失職
者衆而州縣之員有限不足以充其求乃至逆用數年
之缺先者未至已復揭榜而待其後矣苟於是中尚容
姦倖則可乎軫于朕懷申飭憲禁方賴卿等草茲弊源

而遽求罷去豈朕所望如卿才能學識蓋一時之選惟
悉乃心勤乃職使吏不得用法而士無謗言朕復何慮
所請宜不允故茲詔示想宜知悉

賜左奉議郎試尚書吏部侍郎兼侍講陳與義
乞除一在外宮觀不允詔

勅與義省所奏乞除一在外宮觀差遣事具悉朕建立
邦國於剝亂陵夷之後號召人材於流離解散之餘有
德于茲將收其用夫豈無故而遐棄之卿以碩學懿文

宏材瞻智來從孤遠越置近嚴綸閣擣辭識王言之體
天官典選得士譽之公方觀厥成克副朕志遽以疾諗
欲輕去朝何嫌何疑而為計出此姑安乃職毋復多言
所請宜不允故茲詔示想宜知悉

賜吏部侍郎兼直學士院兼侍講陳與義乞除
一在外宮觀差遣不允詔

勅與義省所奏乞除一在外宮觀差遣事具悉朕惟銓
衡人物必有清通之才勸講經惟必有鴻博之學發揮

帝制必有典雅之文夫然後稱卿以時望登于從班兼
茲三長獲為朕用矧其辭章為後來之冠議論合當世
之宜求之在庭幾見其比人才難得國步猶艱顧如卿
者可因引疾而聽其去哉勉體眷知毋徒辭費所請宜
不允故茲詔示想宜知悉

賜新除檢校少保定國軍節度使依前知樞密
院事宣撫處置使張浚辭免恩命不允詔

勅張浚省所劄子奏辭免恩命事具悉迺者外侮憑陵

中原梗阻整予師衆姑巡守於南邦煩我樞臣往分憂
於西鄙盡護諸帥屢當強胡顧失利富平豈不賢於避
敵及鏖兵岐下迺終底於成功一戰之威三軍克振有
嘉忠略爰賜寵章假孤棘之班資建將旄之儀物併昭
異數式勵羣情胡爾好謙尚茲請避雖推原雅志固非
爵祿之求而進復舊疆正欲功名之勸勉膺茂命毋事
勞辭所請宜不允故茲詔示想宜知悉冬寒卿比安好
遣書指不多及

賜檢校少保定國軍節度使知樞密院事宣撫
處置使張浚乞檢累奏賜黜責別選大臣經營

關陝不允詔

勅張浚省所奏乞檢累奏賜黜責別選大臣經營關陝
事具悉勝負兵家之常要以成功而為主安危大臣所
寄豈其微青之是尤卿威望在人誠心許國自分憂於
一面蓋禦敵者三年壯志弗渝遠圖可必彼將帥之不
競非方略之實然矧後効之已彰顧前奔之孰議載披

來請殊拂朕懷昔楚不赦得臣徒益文公之喜而晉復用林父卒成赤狄之誅得失之間遠近如此尚其畢力毋復多云所請宜不允故茲詔示想宜知悉秋冷卿比安好遣書指不多及

賜檢校少保定國軍節度使知樞密院事張浚
乞罷知院事不允詔

勅張浚省所劄子奏乞罷知樞密院事具悉卿任居近輔身荷大功佐佑弼諧正仰忠賢之力周旋恩禮敢遺

勲舊之臣既屢詔以遄歸猶固陳而辭位雖樂羊多謗
朕將投篋以焚書而郭令可師卿其聞命而就道矧初
無間何所致疑佇入告於嘉猷以終圖於大計勉成朕
志毋費乃辭所請宜不允仍依累降指揮赴行在故茲
詔示想宜知悉春寒卿比平安好遣書指不多及

賜檢校少保定國軍節度使知樞密院事張浚
請罪不允詔

勅張浚省所劄子奏富平之師嘗致敗績不能攘敵復

上願請罪於司寇以懲不敏况孀親垂老乞賜骸骨以盡孝養事具悉卿之引咎陳誠屢矣而朕開諭之辭亦以數下謂當深體母復有疑茲聞趨命而來將遂入見虛懷以俟渴聽嘉謀乃猶抗言固求歸養君臣之間情阻不通朕用歉焉夫卿委質以從朕於艱難舊矣方新過家而將母來諗無乃非卿許國之素而違昔人養志之誼乎其亟造朝副予注意所請宜不允依累降指揮疾速赴行在故茲詔示想宜知悉春暖卿比平安好遣

書指不多及

賜知樞密院事張浚乞許辭免先除檢校少保定國軍節度恩命不允詔

勅張浚省所上表乞許辭免先除檢校少保定國軍節度使恩命事具悉日者卿專制行謀盡護諸將破敵岐梁之際虜衆載殲伸威巴蜀之衝人心克固惟指縱之功既茂則褒揚之命宜先賞已定於三年恩豈移於一旦迨將入見乃更力辭顧六纛多儀允稱本兵之任而

貳公顯秩雅宜輔政之司何所嫌疑毋煩避避所請宜不允仍不得再有陳請故茲詔示想宜知悉春暖卿比平安好遣書指不多及

賜太尉定江昭慶軍節度使神武右軍都統制

張浚乞一在外宮觀差遣許任便居住不允詔

勅張浚省所樞密奏據卿申乞一外任宮觀差遣許任便居住事具悉卿結髮從軍積功百戰忠誼之性出于天資事朕累年備宣勞勩如卿自列朕所深知方邊報

尚新而防秋甚邇正資宿將以扞外虞遽求退閒豈朕
所望矧士馬之蕃耗器械之有無蒐補繕修卿之職也
其條所務以上樞庭益思先事之圖毋作自安之計國
家休戚卿實同之所請宜不允仍不得再有陳請其見
闕軍馬器甲條具措置申樞密院故茲詔示想宜知悉
賜知樞密院張浚乞在外宮觀差遣不允詔

勅張浚省所奏乞在外宮觀差遣事具悉卿功存社稷
任總樞機雖閔勞師旅之繁正倚重廟堂之望矧五年

在外渴欲見卿而四輔居中久難虛位亟下遣歸之詔
猶披引疾之辭載惟上命之行禮毋俟駕俯亮乃心之
素忠豈忘君其趣來歸以圖遠略求閑之語匪朕所期
所請宜不允仍依累降指揮疾速赴行在故茲詔示想
宜知悉秋冷卿比平安好遣書指不多及

賜新除徽猷閣學士提舉臨安府洞霄宮詹又
辭免恩命不允詔


勅詹又省所奏辭免恩命事具悉卿年加耆艾時謂老

成從朕于艱勤勞惟舊名還東省曾未淹時惜其旅力
之愆重煩官職之事畀真祠之優廩仍延閣之近班示
朕至恩皆卿舊物往綏壽祉毋事謙辭所請宜不允故
茲詔示想宜知悉秋冷卿比平安好遣書指不多及

賜端明殿學士左中大夫知饒州軍州事主管
孽生監牧董耘乞除在外官觀差遣不允詔

勅董耘省所奏乞除一在外官觀差遣事具悉朕訪道
燕間欲舊人之自近登賢禁路須論者之僉諧惟卿久

去內朝甫安便郡賜環初召益思代邸之勤勞偃節復
留非若河東之毀譽始終不替內外何殊第堅體國之
誠姑勉治民之最遽求退避曷副眷懷所請宜不允故
茲詔示想宜知悉冬寒卿比平安好遣書指不多及



欽定四庫全書

集部

北海集卷十六至十八

詳校官石中允臣薩敏

主事臣呂雲棟覆勘

謄錄監生臣南光城

欽定四庫全書

北海集卷十六

宋 綦崇禮 撰

勅

賜知隨州李道獎諭勅書

六月二十四日

勅李道省德安府復州漢陽軍鎮撫使陳規奏承知隨州李道公文稱於今年五月初二日酉時隨縣尉司申解捉到李周劉智二人稱係偽齊劉豫下奉使張玩等差齎偽勅檄書來隨州下文字係要招降竊以本州官

吏軍民父祖累世受本朝涵養之恩二百餘年昨自兵
火之後惟竭盡忠節上報朝廷豈忍遽從偽命今來偽
齊劉豫亦是大宋臣子尚敢遣人齎偽勅書強要招降
侵展疆土孰不切齒除已將李周劉智盤枷并偽勅檄
書繳連解送本鎮兼具此申奏朝廷事自遠夷結禍中
土靡寧乃眷襄隨重罹兵火尚賴忠誼豪傑之士不忘
國家涵養之恩心存本朝力卻偽使連書詞而來上陳
悃幅以甚明灼見純誠良深嘉歎勉堅令節佇立殊勲

故茲獎諭想宜知悉夏熱汝比好否遣書指不多及

賜襄陽府統制軍馬李橫獎諭勅書

六月二十四日

勅李橫省德安府復州漢陽軍鎮撫使陳規奏承襄陽
府統制軍馬李橫公文稱五月三日午時有偽齊劉豫
遣奉使彭義并親隨郭立齋偽勅檄書前來到府竊以
祖父以來食大宋水土僅二百年方圖補報忽見此書
痛憤不已除將郭立凌遲處斬號令外所有奉使彭義
并齋到偽勅檄書並已解發赴行在去訖事自遠夷結

禍中土靡寧乃眷襄陽重罹兵火尚賴忠誼豪傑之士
不忘國家涵養之恩心存本朝力卻偽使連書詞而來
上陳悃幅以甚明灼見純誠良深嘉歎勉堅令節佇立
殊勲故茲獎諭想宜知悉夏熱汝比好否遣書指不多
及

賜武功大夫貴州團練使統制軍馬李宏獎諭

勅書

六月二十七日

勅李宏省福建江西荆湖南北路宣撫使司奏潭州申

馬友自到跋扈恣橫六月一日李宏將馬友處置訖事
朕以馬友恃衆阻兵連年叛命戒於多殺姑務涵容而
汝疾惡之資出於天性體國之志備見誠心殲厥渠魁
既少申於衆憤撫其部曲俾還齒於王人載覽奏陳良
深嘉尚故茲獎諭想宜知悉夏熱汝比好否遣書指不
多及

賜陳彥明下一行官兵等獎諭勅書

八月
二日

勅陳彥明下一行官兵等黜賊彥舟負國大恩甘心偽

命罪盈惡稔天罰可逃汝等各保忠誠弗從叛亂克整其衆自歸本朝使臣以聞良用嘉歎已命大帥收撫師徒尚肩一心以圖報力故茲獎諭想宜知悉秋涼汝等比好否遣書指不多及

賜武功大夫遙郡防禦使襄陽府郢州鎮撫使

李橫武義大夫兼閣門宣贊舍人鄧隨州鎮撫

使李道權知鄧州桑立獎諭勅書

八月二十一日

勅李橫等汝夙秉至忠深明大義雖屬艱難之際弗迷

順逆之宜執賊使以來歸却檄書而不答臣子之誠無
貳神明之鑒所臨周覽敷陳良深咨歎尚其奮勵以建
功名故茲獎諭想宜知悉秋涼汝比好否遣書指不多
及

賜廣南東西路荆湖南北路兩浙東西路福建

路江南東西路州縣官吏等勅書

十月
八日

勅廣南東西等路州縣官吏等朕以中原否隔狄難歲
滋巡省治兵久淹江表惟是六師供億調度之繁以盜

賊干戈誅求之苦擾吾郡邑害及生靈終夜以思當食而歎雖詔書寬恤赦令蠲除以時而下尚慮奉行之吏便文自營徒掛牆壁使吾惻怛哀矜之意不能下究而元元之民靡獲霑其實惠朕甚愍之肆簡忠信之使分路循行逮諸郡縣檢察詔令平反刑獄觀問風俗宣布德意付以親札之歷使按舉必書以稽其殿最丁寧告戒躬臨遣之惟爾在官小大之臣斯亦知朕志矣其相率勵各公乃心勤乃職毋荒失朕命務安吾民凡使者

之所上聞朕將即其功罪以示勸懲隨其情修加以誅賞爾乃狃於習俗行或不良將冒吾禁其灑心易慮務自悔革勿蹈大刑朕言必行惟明聽之毋忽故茲示諭想宜知悉冬寒汝等各比好否遣書指不多及

賜慶遠軍官吏軍民僧道耆壽等示諭勅書

十月

十九日

勅慶遠軍官吏軍民僧道耆壽等朕以邢煥親居后父蚤推姻閥之賢寵建戚藩茲廣合宮之慶留奉祠於琳

館俾遙領於龍江時維邦翰之良匪特椒房之重旌旄
載道知遠服之增光典冊告廷想羣臣之咸喜今特授
邢煥慶遠軍節度使充醴泉觀使特封德清縣開國子
食邑五百戶食實封二百戶故茲示諭想宜知悉冬寒
汝等各比好否遣書指不多及

撫諭四川路勅書

十二月二
十四日

勅成都府潼川府利州夔州等路官吏軍民等朕慨覽
輿圖計安邦域眷予梁蜀自我祖宗寬彼政刑革異時

之苛急順其風俗俾終歲以遨嬉甲子再週干戈不試
怨咨之氣弗起安樂之音相聞繫國家施德澤之深故
民物極庶繁之美豈虞他盜輒亂諸華流毒關中遂肆
侵陵之計垂涎劔外未忘吞噬之心幸背城伸一戰之
威獲守險為四川之障然而師徒久役備禦尚嚴轉粟
兵間固多勞苦取民賦外諒數誅求所期整費而永寧
夫豈好勤而惡逸夙宵在念焚灼於中惟暴強而弗戢
則敵當自摧惟禍亂之已窮則時當自定皇天是輔佇

成綏靖之圖王化復行終底和平之會往體至意尚肩
一心故茲撫諭想宜知悉冬寒汝等各比好否遣書指
不多及

撫諭陝西路官吏軍民等勅書

十二月二
十四日

勅陝西路官吏軍民等朕躬履多艱力興大業勒兵吳
會以北控於江淮分帥秦川俾西臨於關塞庶將復國
用克息民嗟謀畫之未良致師徒之不競委金湯而弗
守半已墮殘縱蛇豕之無厭恣其吞噬靡顧黎元之禍

但資僭竊之臣淪陷者無路以自歸散亡者有生而皆
棄流毒爾衆痛切朕心是用更命近臣往護諸將既撫
循於凋瘵且備禦於侵陵毋逞淫刑務行寬政庶反側
者罔迷於首鼠而逋逃者還齒於吾人共圖戡定之期
終底和平之舊體斯至意肩爾一心故茲撫諭想宜知
悉冬寒汝等各比好否遣書指不多及

撫諭

缺

州軍勅書

四月三日

勅某州軍官吏軍民等自釁纏朔土禍結中原不虞僭

叛之徒敢肆猖狂之計神州既梗王命未通痛爾士民
陷茲塗炭舊都舊邑力雖劫於兇威我子我臣志豈忘
於歸戴稍聞忠誼寢效欵誠察人意之合符知天心之
悔禍克將所部還奉本朝唇齒相依同盟而獎王室倚
角以進連衡而折寇讎務救災而恤隣且講信而修睦
勿懷私忿勉就大功期九廟之再安庶兩宮之可復山
河之誓金玉不渝故茲撫諭想宜知悉夏熱汝等好否
遣書指不多及

賜新除武節大夫遙郡刺史依前閣門宣贊舍

人權商號陝州鎮撫使兼知虢州董震獎諭勅

書

四月三日

勅董震自兵纏雍洛地隔江湖顧王命之未通豈人心
之能固夙宵在念焚灼於懷惟汝克殿一邦并連他郡
既倡端而效順將相帥以歸真天無疾風安知勁草人
當亂世乃見純臣載亮勤誠屢形咨歎已加爵命就畀
藩方惟神相於至忠矧事從於大誼庶由乃力能一衆

情免就功名副子嘉尚故茲獎諭想宜知悉夏熱汝比
好否遣書措不多及

賜唐州官吏軍民等撫諭勅書

四月十日

勅唐州官吏軍民等自神州既梗王命遂睽痛爾士民
陷茲塗炭舊都舊邑力雖劫於兇威我子我臣志豈忘
於歸戴果聞忠義來效勤誠察人意之合符知天心之
悔禍各堅爾志還奉本朝唇齒相依同盟而獎王室倚
角以進連衡而禦寇讎務救災而卹隣且講信而修睦

勿懷私忿勉就大功期九廟之再安庶兩宮之可復山河之誓金石不渝朕所念也爾其懋哉故茲撫諭想宜知悉夏熟汝等各比好否遣書指不多及

賜翊衛大夫忠州觀察使神武左副軍統制西
京陸招撫使襄陽府鄧隨郢州鎮撫使兼知襄
陽府李橫利州觀察使河南府孟汝鄭州鎮撫
使兼知河南府翟琮武功大夫吉州觀察使河
南府孟汝鄭州鎮撫使董先武節大夫貴州刺

史兼閣門宣贊舍人權商號陝州鎮撫使董震
親衛大夫安州觀察使唐州信陽軍鎮撫使知
蔡州牛臯武功大夫吉州團練使知汝州彭玘
武義大夫閣門宣贊舍人鄧州南陽縣界巡綽
盜賊牛寶修武郎閣門祇候權河陽安撫使王
偉武經大夫達州刺史知信陽軍趙起武功郎
閣門宣贊舍人知唐州朱全武翼郎閣門宣贊
舍人鄧州南陽縣把隘官朱力成撫諭勅書

五月

勅李橫等朕淹汨南邦顧瞻中國神都舊宅猶聞戎馬
之依憑赤子遺民特困敵人之驅迫天終助順人果懷
歸肆時鎮守之臣迭效忠勤之績每嘉汝志實動予衷
維亂既極以趨安且惡已盈而將敗賴汝豪傑成此功
名仗大義以連行要倚輔車之勢肩一心而戮力當如
手足之親各務協和更相勉勵期大復祖宗之宇以並
書社稷之勲姑捐爾私共濟國事故茲撫諭想宜知悉

夏熱汝比好否遣書指不多及

改賜李橫等勅書

五月十三日

勅李橫等朕失馭中原省方南國眷茲列郡孰保吾民
維時鎮守之臣克效忠勤之績每嘉忠志實動予心屬
暑候之方炎念戍徒之良苦禦侵待暴姑慎守於封疆
按甲緩兵其少休於士卒拊循凋瘵勸課耕桑務收綏
靖之功終底和平之福故茲撫諭想宜知悉夏熱汝比
安否遣書指不多及

欽定四庫全書

北海集卷十七

宋 綦崇禮 撰

口宣

高麗使副朝見託歸館賜御宴口宣

三月二十一日

有勅卿等遠脩方貢來會時巡既入造朝復休就舍載嘉恭順宜賜燕私今差某官賜卿等御筵想宜知悉

高麗使副朝辭賜御筵口宣

三月二十三日

有勅卿等觀光入覲已事告還眷言去路之長屬此歸

艸之迅宜頒燕飫以示恩私今差某官賜卿等御筵想
宜知悉

批答

賜新除叅知政事張守上表辭免恩命不允仍
斷來章批答

省表具知朕權時之宜以宰執大臣通治三省使政事
歸一而責任維均庶幾同寅協濟多難卿文能華國道
足治君夙懷王佐之才寔應中興之輔頃由鼇禁擢贊

鴻樞雖兵機專帷幄之籌而政柄隔鈞衡之地肆從改命式副疇庸惟卿素推體國之誠顧朕自負得賢之喜胡為謙挹猶爾逡巡其勉就於大功勿徒拘於小節所請宜不允仍斷來章批答口宣

有勅久同艱險深諒忠勤肆輟領於中樞俾進陪於大政方需偉績勿事固辭今差

賜新除端明殿學士簽書樞密院事趙鼎上表
辭免恩命不允仍斷來章批答

省表具知士大夫好議久矣平居天下之事知之患不得言言之患不得行今朝廷遷播國制捨攘政令所施咸出一切豈無事之可議而不獲上聞者卿以直諒之資任風憲之責盖常侃侃為朕言之朕既察其忠誠虛心開納然徒使卿排擊當權以言之於下孰若其協心國論以行之於上是用延登廊廟參秉樞機顧視前時弊病闕失多懷慙不平之氣今而攄發猷為可以大伸其志矣方資倚賴冀圖厥功謙抑逡巡非朕所望其祇

成命勿復重陳所請宜不允仍斷來章批答口宣

有勅卿夙懷忠略久著直聲進陪樞筦之司實慰搢紳
之論體茲深眷母事固辭今差

賜新除叅知政事謝克家上表辭免恩命不允
仍斷來章批答

省表具知史臣有言用人非難用人盡其才為難誠哉
是言也夫建明堂營大厦必求材於楸栢豫章之木顧
梁楹棟幹之弗取斲而小之乃以充椳栝之細其可以

言用材也歟卿識量宏達學術深醇足以任重而致遠
朕之知卿久矣每欲收用而每不果中實歟焉召自藩
方甫還朝著采之物望副之宿心遂斷不疑擢陪大政
庶幾朕無用不盡才之悔而卿亦獲大展其才輔朕以
有為於時矣方宜戮力叶濟艱難辭遜小廉朕所不取
亟祇乃事毋復重陳所請不允仍斷來章批荅口宣
有勅卿行能高世德望腆時既登貳於政機實允諧於
物論往服已行之命毋煩屢至之辭今差

賜新除都監江淮兩浙荆湖諸軍事呂頤浩上
表辭免恩命不允批答

省表具知朕獲承丕緒屬此中微方內正於綱維且外
攘於暴亂顧文武貳柄不可有分而軍國異容孰能兼
任眷我鈞衡之老獨高社稷之功精神足以折衝威望
自然鎮物肆以上公之重往臨八路之師庶克震於天
聲遂再安於國步卿之志也何以辭為所請宜不允批

答口宣

有勅卿中秉國鈞外嚴師律聳華夷之觀聽寄宗社之
安危渙號已行謙辭何有今差

賜呂頤浩再上表辭免恩命不允仍斷來章批

答

省表具知卿位隆輔相望重勲賢牧野蒞師允屬鷹揚
之大老新亭止泣豈惟江左之夷吾顧國論之攸同患
兵權之不一乃煩上宰盡督諸軍惟卿慨然自任於安
危則朕庶乎少寬於宵旰察衆志之咸定何君言之太

謙其體至懷母為固避所請宜不允仍斷來章批答口
宣

有勅卿忠惟許國志在康時兼隆將相之權無易勲勞
之舊體茲至意勿復重辭今差

賜新除叅知政事翟汝文上表辭免恩命不允
斷來章批答

省表具知朕以國勢未安責在輔政之臣懲數易之煩
慎厥付予歷選於衆乃得老成式邁其歸引以自近幾

聞竒論協濟艱難卿既幡然而來副朕斯意胡為抗章
猶以衰疾為解顧卿年加而志彌壯養厚而氣愈剛庶
幾乎精神折衝坐鎮雅俗夫豈勞卿以筋力之事為哉
往體至懷毋復堅避所請宜不允仍斷來章批答口宣
有勅卿三朝舊德當世名臣方圖輔政之功咸有得人
之慶亟祇成命勿事勞辭今差

賜新除端明殿學士僉書樞密院事權邦彥上
表辭免恩命不允仍斷來章批答

省表具知朕遭時多難思復大業永惟二三政事之臣
是咨是圖登用之際其何敢易乃者右府虛位陰察在
廷顧端亮之姿靖重之器更事久慮患深老成可親亡
踰卿者肆頒顯命擢與籌帷蓋體朕知職思其報雍容
辭遜豈所望哉所請宜不允仍斷來章批答口宣
有勅卿忠純一德夷險百為方登樞密之嚴佇決廟謨
之勝亟祇乃事庸副朕懷今差

賜新除尚書右僕射同中書門下平章事朱勝

非辭免恩命不允斷來章批答

省表具知朕閔國多艱需人共濟金穀甲兵之間每至於廟堂鹽梅舟楫之求實勞於巖野適吾舊德歸造行朝顧雅望之素高惜前功之未究俾還分於台揆以對秉於機衡方今狄患猶滋政多外懼邦基未定孰與中興惟夙懷許國之誠宜大展匡時之略庶其戮力用克解憂朕既急於得賢卿盍思於愛日雍容辭遜豈所望哉所請宜不允仍斷來章批答口宣

有勅卿道可致君忠宜謀國用再圖於舊德以協濟於
多虞成命既行謙辭何有今差

賜新除武泰軍節度使郭仲荀上奏辭免恩命
不允批答

省表具知卿承家無忝在事有勞坐累謫官既歸宿衛
逢恩滌釁當復班聯專節制於元戎寄曲司於環尹時
卿之舊匪朕其私渙號已孚謙辭毋固所請宜不允批
答口宣

有勅卿需澤載更官儀當復爰畀將旄之舊用昭邦典
之常宜即祇承勿勤遜避今差

賜郭仲荀再上表辭免恩命不允仍斷來章批
答

省表具知朕體覆載之無私舉恩威而迭用顧弭災肆
宥澤已逮於幽遐忘過念勞寵可稽於貴近欲壯殿巖
之勢俾還將鉞之榮邦典有常師言惟穆亟祇休命毋
事飾辭所請宜不允仍斷來章批答口宣

有勅卿服勤巖陛加寵藩旄唯予命渥之新時乃官儀
之舊奚為固避勿復重陳今差

賜新除慶遠軍節度使邢煥上表辭免恩命不
允批答

省表具知朕躬祠總章均慶寰宇乃眷椒房之澤應逮
其親肆崇藩閫之儀用光厥族矧卿官班一改歲律五
周辭要地而弗居奉殊庭而自抑於義當得非親敢私
往服寵榮奚煩謙避所請宜不允批答口宣

有勅比推祭澤爰舉邦彛特頒將鉞之華用錫戚藩之
祉亟祇茂渥毋飾謙辭今差

賜同都督江淮荆浙諸軍事孟庾上表辭免恩
命不允仍斷來章批答

省表具知朕惟股肱一體休戚所同世當承平則大衣
高冠雍容廟堂而有餘時屬多故則躬擐甲冑馳驅軍
旅而不足朕豈不欲與二三臣坐論於上無為而用天
下哉顧方親總六師嘗膽苦志力圖中國之難則夫入

參政柄出董戎旃以是委卿而不少休息者寧所得已
往體朕意益勵壯猷辭遜之常於卿可略所請宜不允
仍斷來章批答口宣

有勅卿中聯近輔出董全師揆已試之成功實克堪於
重寄往圖遠略毋事謙辭今差

賜新除參知政事席益上表辭免恩命不允仍
斷來章批答

省表具知恭惟祖宗慎圖輔臣置相之外別咨其副要

使可否相濟共成厥功大厦非一木之支太平非一士之略矧難虞之際任大事叢急務所先朕何敢忽久虛厥次實需其人顧惟器識淵深知略輻湊重厚之質通達之才選衆比賢無出卿右斷以必用尚其可辭所請宜不允仍斷來章批答口宣

有勅卿進陪國論允穆師言繼披重複之辭載諭丁寧之意亟祇承命用副眷懷今差

賜新除端明殿學士同簽樞密院事徐俯上表

辭免恩命不允仍斷來章批答

省表具知朕惟中興撥亂之圖須人以濟非能越拘攣之俗求傑異之士則不足與共功乃者召卿於外直寘近班而不以為過者蓋讀卿之文而知其學察卿之言而知其識耳及出入禁闈累月之間進沃朕心備聞竒論參陪樞輔斷用不疑夫君臣之遇固有相得於一言之頃者則卿之用晚矣何以辭為所請宜不允仍斷來

章批答口宣

有勅卿夙負瓌材起膺迅用覽奏陳之周悉諭旨意以
丁寧往體至懷毋為固避今差

賜新除信安郡王孟忠厚上表辭免恩命不允

批答

省表具知卿生於戚里而夙敦儒素進由文吏而今享
王封貴豈力求蓋本高門之慶寵非私子實懷先后之
恩授受之間存往無憾渙音已布謙避奚為所請宜不
允批答口宣

有勅卿地並親賢位兼將相進被后家之澤宜膺王爵
之封已諭至懷毋留成命今差

賜忠厚再上表辭免恩命不允仍斷來章批答
省表具知卿以方壯之年勵好文之志而地居戚里名
列武班雖兼將相之官已極王侯之爵篤慶則厚存心
宜然疊露忱辭益知雅尚永念昭慈之盛德流澤既深
重惟姑姪之近親疏恩可薄非徒乃寵聊致予恩往體
至懷毋煩堅避所請宜不允仍斷來章批答口宣

有勅卿頃易儒紳載持將鉞既擬公槐之重遂分王社之榮鶴諭已周謙辭毋固今差

賜新除端明殿學士同簽書樞密院事韓肖胄

上表辭免恩命不允仍斷來章批答

省表具知茲者上天悔禍強敵欲和眷惟使指之躋緊我柄臣之重卿奕葉元宰勲德相高累歲從班名實咸著進與樞機之任時乃世官出勤輅傳之行亦其舊職庶賴承家之美克收平國之功姑往定盟即還輔政勉

徇安危之計毋煩辭遜之文所請宜不允仍斷來章批
答口宣

有勅卿選於相闕任以樞庭欲圖平國之功遂俾出疆
之事載加鑄諭毋復牢辭今差

賜新除參知政事趙鼎上表辭免恩命不允仍
斷來章批答

省表具知朕慎擇輔臣緬懷舊德適茲虛次趣以來歸
將入見於便朝俾即聯於政路盖知賢而既審則斷用

以何疑猶貢封章力辭寵命念昔之去國曾未展於謀
謨而今也逢辰諒克諧於志願矧兩宮之久隔若四境
之多虞恢定中原撫寧百姓咸卿言之及此豈朕慮之
有它勉共遠圖毋煩固避所請宜不允仍斷來章批答
口宣

有勅卿久去中樞比更外鎮既稔隆於物望宜參預於
正司猶貢忱辭用加申諭今差

賜新除端明殿學士簽書樞密院事胡松年上

表辭免恩命不允斷來章批答

省表具知朕以天步猶艱邦基未定必求當世搢紳之傑以贊一時帷幄之籌卿慮極幾深才優經濟介行人而專對能備察於敵情答使者以受辭實參裁於密議間從諏訪益見謀猷惟克盡於小心知能恤於大事疇咨既審登用何疑命不可還辭其毋固所請宜不允仍斷來章批答口宣

有勅卿才猷可賴望實既孚肆陞秘殿之華俾贊中樞

之政已頒成命難徇謙辭今差

欽定四庫全書

北海集卷十八

宋 基崇禮 撰

表

內中講筵殿改作謝晴道場散罷表

維紹興二年歲次壬子五月朔日嗣天子臣就內中講筵殿開建謝晴道場者伏以有皇上帝陰隲下民屬淫雨之淹期即齋居而致禱惟無憂不燭普矜望歲之勞而有感必通盡掃積陰之沴人心喜悅天宇開明爰修

醮謝之儀尚卒豐穰之賜臣無任懇禱之至謹詞

內中謝雨道場罷散朱表

臣某言伏以罷散天慶觀謝雨道場設醮一座三百六十分位者伏以人心閔雨嘗仰叩於高穹帝意佑民遂普霑於甘澤顧茲菲德曲荷洪私載惟眷命之休敢怠憂勤之責邊塵未靖期盡掃於妖氛農穡將成尚無傷於樂歲臣無任精虔激切之至謹奉表奏告以聞

內中祈禱道場罷散表

臣言伏為罷散內中祈禱道場設醮一座三百六十分位者伏以天鑒溥臨仰著明於垂象星躔變異實謹告於眇躬敢陳祈醮之儀庶格精誠之應轉禍為福儻克弭於凶哉惟德動天敢自忘於修省臣無任精虔激切之至

禳謝道場罷散朱表

臣言伏為罷散禳謝道場設醮一座三百六十分位者伏以君德未明豈有讒邪之感天災荐至是逢焚灼之

憂顧黎庶之何幸寧高真之或忍是用恭依科教祇列
醮儀爰飭精誠庶回昭鑒遇災而懼敢忘修省之勤作
善降祥終底和平之福臣無任精虔激切之至

昭慈獻烈皇后大祥奏告櫛宮表文

臣某言伏以喪期有既嗟駟隙之難停祥祭遽臨望栢
城而增感恭惟昭慈獻烈皇后功存神器德被眇躬禮
雖盡於三年恩則隆於萬世永言悲慕罔克勝任謹差
某官奉表奏告以聞臣某誠惶誠懼頓首頓首謹言

昭慈獻烈皇后祔廟畢攢宮旦望節序表本

伏以參伏星纏歎隙駒之易失草薰輦路悵羽駕以何
之恭惟昭慈獻烈皇后德洽宮闈功存社稷望佳城之
永閉履芳節以時思哀緒難任徽音無盡

三月
旦

伏以曲水傳觴感流年於景物遺衣在寢追懿範於宮
闈恭惟昭慈獻烈皇后躬履艱難志存慈儉及芳辰之
可樂嗟大養之已違但驚時序之遷空結園陵之戀已上
伏以并土舊傳已舉葦煙之令稽山新卜甫臨上冢之

期拜掃不親瞻思徒切恭惟昭慈獻烈皇后扶持神器
擁佑眇躬未伸孝養之誠忽歎僊遊之邈敢忘時薦仰

答慈恩

寒食節

伏以穀雨初濡見農功之畢務公桑載綠感蠶事之方
興恭惟昭慈獻烈皇后道盛母儀德侔坤載望僊遊之

何所瞻遺範以空存韶景易闡孝思曷已

三月望

伏以候應清和未改春生之德身離供養還悲夏清之
期恭惟昭慈獻烈皇后化洽宮闈功存社稷望音容之

如在嗟晦朔之俄周歲月有窮哀思無既

四月
旦

伏以宮衣忽掩驚月魄之淪輝燧火俄更歎星纏之周
次隙駒難駐僊馭奚攀恭惟昭慈獻烈皇后德被眇躬
力扶大寶方承顏而盡養乃厭世以登遐及茲奉諱之

辰彌切懷思之念

四月十四
日忌辰

伏以金徽戢響悲維夏之初薰露麥飛芒感有秋之新
薦慈顏在慕孝養已違恭惟昭慈獻烈皇后母道無前
陰功有行即簾帷而再御安鼎祚以重新遺訓敢忘哀

誠難寫

四月望

伏以葉換階莫未變清和之候陰敷宰木重興感慕之
懷恭惟昭慈獻烈皇后德盛四朝功存萬世不返乘雲
之馭已踰改火之期夏清永違時思徒切

閏四月旦

伏以氣餘當閏寢驚歷候之還月滿正中載感母儀之
象恭惟昭慈獻烈皇后聖明超古慈儉自天功高彤管
之書德盛練衣之訓歲時易失思慕難忘

閏四月望

伏以星火方中遂正南訛之候陵園永閉奚勝東望之

懷恭惟昭慈獻烈皇后坤載無私母儀有託未極孝心
之報忽驚僊馭之遐急景頻遷長哀莫既

五月
旦

伏以楚俗良時甫屆浴蘭之節越山佳氣遙瞻拱木之
原恭惟昭慈獻烈皇后盛德無名至仁有勇折大奸於
指顧避兵安事於靈符損上壽於憂勤續命空悲於綵
縷載追懿範第極哀悰

重
五

伏以長夜難晨痛泉扃之晝掩流年易老感木槿之朝
榮災序載中慈顏永隔恭惟昭慈獻烈皇后仁同長養

道極高明繫社稷之再安豈簾帷之得已空餘女史能

播母儀

五月望

伏以慶集猗蘭載紀眇生之始悲纏長樂已嗟大養之
違恭惟昭慈獻烈皇后保佑深思慈仁德威驟隔家人

之禮但瞻陵栢之陰感慕增懷追攀勞望

聖節

伏以火暄方升金微初伏仰天時之迭運感人意以增
悲恭惟昭慈獻烈皇后早正坤元晚安鼎器甫致東朝
之養遽從先后之遊廟室猶新始奉麥瓜之薦園林甚

迥漸驚松檟之長緬想徽音難勝哀緒

初伏

伏以日回東井知溽暑之方隆地近南溟覺炎蒸之彌
異恭惟昭慈獻烈皇后業貽萬世慈化六宮陵木已陰
徒感追涼之會寢闈既寂空餘欲清之心盛德難名悲

悼奚叙

六月旦

伏以月滿栢城始見飛螢之度塵昏椒壁還聞促織之
悲夏景將闌時思曷已恭惟昭慈獻烈皇后功高漢鄧
德邁周任大養已違空感南陔之詠遺芬無盡永傳彤

管之書

六月望

伏以大火西流驟減故宮之暑涼風朝至還悲拱木之
秋恭惟昭慈獻烈皇后儷德乾元齊功坤載年華晚晚
嗟供養之永違懿烈芬芳但懷思而無斃

七月旦

伏以殿闕奉華詎覩班龍之駕山遙緹氏應同白鶴之
升愴僊馭之難追感母儀之增慕恭惟昭慈獻烈皇后
道高往後功冠本朝想神靈之在天望星河而賈涕空
餘懿烈永播鴻名

七月旦